

Pedro Punta Cartacushan

Cayta Pedrom lluy chi'isha^a chalapacücunäman cartacun. Paycunam chalapacushan-laycu imaymana sasachacucunacta ñacaycunacta pasayalcäla. Chaymi cay cartanpa callpanchaycun caycunacta: Jesus wañul shalcamushanpamá salbaycamälanchicña. Chaymari Tayta Dios nunancunapä tucachimänanchiccunäman sumä alcaštín cawsanchic. Chaymi chay imaymana pasashancunachu cawsaycälinan Diospa nunancunanu. Allincä-laycu Jesusninchicu ñacaycuymi mas allin chay mana allincäpi ñacashanchicpità. Chaymi masqui uyway nunapis, duyñunpis, casäducunäpis allincämannuy lluy cawsaycälinan. Cay allincä-laycu ñacashanchiccunächu mas-mastam tacyalpachimäshun. Jinaman maynu sumä allincächümi caycushunpis niycun.

1 ¹⁻²Jesusninchicpa jucnin puydi cachan ya'a Pedrom isquirbiyamü, malcaquipita juc-lädu malcacunäman chi'isha Diospa aclashancunäman, Ponto-läducunaachu, Galaciacunaachu, Capadociacunaachu, Asiacunaachu, Bitiniacunaachu lluy jamapacücunäman, amcunacta Tayta Dios una-unaypita quiquinpa munayninpä aclapacushushayquicunäman, Chuya Ispiritu japachapacushuptiqui Jesuspa yawarninwan chuyanchäsha-camaña uyaliculcänayquipä cäcunämanmä.

Paypa llaquipayninpitari sumä jawca cawsay amcunaachu caycuchun.

Mushü cawsaypita Diosta alawäshun

³⁻⁴Jesusninchicpa Taytan Dios alawäsha cachun! Sumä llaquipayninwan Jesusninchicpa shalcamuyninpam mushü allin cawsayta uycamälanchic. Chaymari Tayta Dios nunancunapä tucachimänanchiccunäman sumä alcaštín cawsanchic, chay mana camacä allincäman, imaypis mana ismücäman, imaypis mana awicämanmari. ⁵Amcuna Diosman chalapaculcäshayquipam jatun munayninwan licaycälishunqui camacay timpupä chulapushushayquita lluy camalaycachinancama.

^achi'isha: Waquincunaachu'a "wichisha" nipäcunmi.

⁶Chaymari amcuna sumä-sumäta cushicuyalcanqui masqui imaymana sasachacuyacunacta ash timpu pasaycälinayqui cayaptinpis. ⁷Cay sasachacuyacunaca chalapacuyniqui sumä caşhanta licaycunanpämari. Camacä ürullapis ninawanmi sumä caşhanta licaycuşha. Chaynümi sumä mas éhaniyu chalapacuyniquipis rasun caşhanta licaycuşha canan. Jinaptincha tacyaycücätä Jesuspa cutimuyninchu alawäsha, allinpa licaycuşha, altuman juluycuşhalä caycun'a. ⁸⁻⁹Mana licayalcalpis cuyapäcunquimá; mana licayalcalpis payman chalapaculcanquimari. Ñatac salbapäcuşhunayquiman sumä chalapaculcalmi willacuyta mana atipana sumä jatun cushicuylä şhun'uyquiçu caycun.

¹⁰⁻¹¹Aw-ari, Dios cay llaquipayninta amcunaman camalaycachinanpämi unay willacünincuna limapäcula. Masqui Salbacü Jesuspa Ispiritun paycunaçu "Imaymana ñacaycunacta pasaptilämi altuman juluycuşha caşhä" nil niyaptinpis manam tantiapäculachu. Chaymi yaçhaycuyta tantiaycuyta imaymanap wañuy-wañuy ashiycapäcula imay mayçu pasanantapis. ¹²Chaymi paycunacta tantiachila chay timpupä mana caşhanta, sinu'a amcuna timpupä. Chaycunapi janay pachäpi caçhamuşhan Chuya Ispiritup munayninwan canan timpu amcunacta willapäcuşhuşhayquica sumä-sumä tuqui-camamari, aşhta anjilcunäpis licaycuyta munapäcuşhancunämá.

Chuya-camalla allin cawsaycäliy

¹³Chaymi amcuna sumä lichcat-lichcat allin sujitacüsha caycälinayqui. Jesusninchipa cutimuyninchu llaquipayninpi uycälishunayquiman llapan şhun'uyquiwan chalapaculcay. ¹⁴Uyalicü chulicunaña cayalcal'a unay pantäsha caşhayquiçu mana allin munayniquicunamannu'a amañari cawsapäcuychu. ¹⁵Aşhwanpa aclaşhüniquinuy, amcunapis lluy cawsayniquiçhüpis chuya caycäliy. ¹⁶Isquirbishachüpis niyanmari: "Ya'a chuya caşhä-laycu amcunapis chuya capäcuy" nil.

¹⁷Ñatac llapa nunactapis chaycusacta lulayninman tincüta licaycücäta, cäraycücäta "papänimi" niyalcal'a, cay pachäçu caşhayqui-cama manchacuywan-ari cawsaycäliy. ¹⁸Awquilluyquicunäpisp yan'al cawsayniyu capäcuşhayquipi julaycälishunayquipä uycuşhanta tuquictamá yaçhayalcanqui; manamá illaytachu ni üructachu, ¹⁹sinu'a Jesusninchipa sumä éhaniyu yawarnintamá. Chay tuqui chuya şhuñayninta uycuşhancänümari yawarninta jichaycunanpä uycuşha cala. ²⁰Caypämi cay pachaca manaläpis camaşha cayptin unanchaycuşha cä Jesusninchic cay timpucunäçu amcuna-laycu lisichicula. ²¹Canan paypamari Tayta Diosman cha-

lapaculcanqui. Paymi wañuśhapita śhalcalcachil altuman juluycula Tayta Diosllaman chalapacullal alcapäcunayquipä.

²²Cay allin willacuyta uyaliculcäśhayquipam canan śhun'uyqui chuyanchäśhaña cayan chalapacü-masiquicunawan sumä cayanaculcänayquipä. Chayurá lluywanpis llapan śhun'uyquiwan-ari cuyanaculcay. ²³Amcuna caśhan näsishañamari cayalcanqui; manam wañucü milayllapichu, sinu'a wiñaypä cä milaypimi, imaycamapis cawsä Tayta Diospa tacyä shiminpamari. ²⁴Isquirbishaču niyanmari:

“Nunacunaca ula-yupayllam.

Sumä caynincunapis uläpa waytannüllam.

Ulaca chaquinmi, waytanpis śhuśhülunmi.

²⁵Ñatac Diospa shimin'a wiñay simpripämi”^b nil.

Cay shimimari Jesuspa allin willacuynin amcunaman willayca-päcushäca cayan.

Cawsä wasictam chalapacücunäwan śhalcacin

2 ¹Chayurá imaymana mana allincunäta cačhaycälinayquiñam: ingañacuycunacta, ishca yära caycunacta, inbidiacuycunacta, tumpacuycunacta, palanacuycunactapis. ²⁻³Aśhwanpam iñacha lichillapi wañuyäcänuy ispiritunchicpä cä lichiyupaycäpi wañupaculcanquiman. Chaynu Tayta Diospa llaquipayninta yačhayalcalñä chaypamari wiñay allincäpa wiñaycälinqui.

⁴⁻⁵Jesumi Diospa wasinpa sumä chalänin cawsä lumica, nunacunäpa licaytapis mana munaśhanca; Diospäñatacmi ichá sumä čhanyu aclacuśhancälä canpis. Payman aśhuycul'a amcunapis cawsä lumicunanümi cayalcanqui; amcunawanmari sumä chuya wasinta ishpiycachin. Jinaman chuya sasirdüticunaman muyucälinqui Jesus-ninchicpa Tayta Dios allinpa čhasquiyacuśhancäta uycälinayquipämi.

⁶Isquirbishačhüpis niyanmari:

“Licapäcuy, Sionman sumä chalänin aclacuśhan čhanyu

lumictam čhulayá. Chayman chalapacücä manam imaypis

pin'ayču can'achu”^c nil.

⁷Am chalapacücunäpä cay lumi sumä allin čhanyümi. Mana chalapacücunapñatacmi ichá lulacacun cay nishanca:

“Wasi luläcuna jalutacuśhan lumim mas allin puydi chalänin-manlä muyüñä”^d nil.

⁸Jinaman'a:

“Paymi mitcacacuna lumi, cučhpachicü wanca cacuyan”^e

Paycuna allin willacuycäta mana cäsucuyninwanmari cawsaynin-ču mitcacaculcan. ¡Chaypä nishamá capäcun!

^b 1.24-25 Is 40.6-8. ^c 2.6 Is 28.16. ^d 2.7 Sal 118.22. ^e 2.8 Is 8.14.

⁹Amcunañatacmi ichá capäcunqui aclacuśhan milaynin, Mandacü-cäpa sasirdütin, chuya japächaycuśhan malcan, Tayta Diospa nunan. Chay tutapächächu cayaptiqui sumä tuqui acchiman ayaycuśhulanqui sumä alawana lulaynincunacta willaculcänayquipämá. ¹⁰Aw-ari, amcuna unay manam malcanpäpischu licaśha capäculanqui; cananmi ichá Diospa malcanña cayalcanqui. Unay'a manam llaquipaycuśhapis-chu capäculanqui; cananmi ichá llaquipaycuyninchüña cayalcanquipis.

Allin cawsayniqui licachipä caycuchun

¹¹Cuyaśhácuna, pasacü biajiructanümi éhuncay-éhuncay niycälic, ispirituycuiwan chalanacü aychayquip munaynincunapi japächaculcänayquipä. ¹²Ñatac mana chalapacücunächu sumä licachipäri cawsaycäliy. Chaycha masqui canan jucha-sapacunactanuy jamu-yalcäshuptiquipis Diosninchic śhamunancächu'a allin wayuyniquip payta altuman julaycälin'a.

¹³⁻¹⁴Taytanchicöhüña capäcuśhayqui-laycu-ari nunacunächu lluy mandacücunäman sujitaculcay: nasyunpa puydi sumänin mandacü-cämanpis, chaynütac gubirnadurcunämanpis. Paycunamari mana allin luläcunäta mućhuycachinanpä, allincunätañatac alawaycunanpä malcächü-cama éhuläśha cayalcan. ¹⁵Tayta Diosninchic allincäta lulaycälinayquitamari munan, chay luclu mana tantiayniyücunaca ima nishunayquipis mana cäpä cananpä. ¹⁶Libri capäcuśhayqui-mannu-ari cawsapäcuy; amatac libri cayniquita bäliculcul mana allincäta lulayalcaychu. Aśhwanpa Diospa nunannuy cawsapäcuy. ¹⁷Lluytapis allinpäri licapäcuy: chalapacü-masiquicunactapis cuyapäcuy, Tayta Diostapis manchacuywan licaycäliy, puydi mandacücätapis allinpätac licaycäliy.

Jesusmi ñacaycula laśhchunman jaluycunapä

¹⁸Am uyway nunacunäpis patrunkiucunacta allinpa lical sujitaculcay, ama allin cuyacücunällamanchu, sinu'a masqui mana awantaycuna cäcunämanpis. ¹⁹Yan'alpi ñacachisha caśhanta Diospa puntanču tuquicta yaćhacul awantaycücá allin luläpälä licaśham cayan. ²⁰Ñatac juchayquipi ñacachipäcuśhuptiqui'a, ¿ima allintá maynu ñacayta awantaśhayquipis? Allin lulaśhayquipi ñacachipäcuśhuptiqui awantaycuptiquim ichá Tayta Diosninchicpäpis allin caycunqui. ²¹Chaypämaru Jesusninchicnülla amcunapis ayaycuśha capäculanqui. Pay amcuna-laycumari ñacala, chay laśhchunman jalupäcunayquipä. ²²"Pay'a manam ima juchactapis lulalachu ni uchuyllapis casquicta limalculachu."^f ²³Palapäcuptinpis manam

^f2.22 Is 53.9.

limalculachu; ñacachipäcuptinpis manam cutipaculachu, ašhwanpam tincüninman licaycücäpa maquinman quiquin čhulacuycula. ²⁴Paymi curuščäčhu llapa juchanchicta quiquin aychanču apala, juchäpa wañuśhaña canapä jinal allincällapãñatac cawsaycunapä. ¡Chay dañäduncunapmi amcuna allinyaycachisha capäculanqui! ²⁵Unay pulipäculanqui pintiša uwishnümi. Cananmi ichá cawsayniquita Michica, Täpä Jesusninchicman cutilälimunqui.

Wayapapis walminwan rispitanaculcänanmi

3 ¹⁻²Chaynütac amcunapis walmicuna, wayapayquiman sujita-culcay. Chaycha Diospa shiminman mana chalapacücunäpis mana imactapis nillaptiqui allin cawsayniquip allincäman filta-calcämünman, tuqui allin cawsayniquita, rispitu caśhayquita lical. ³Amcunap sumä tuqui chipyayniqui ama janällayquičhu'a caycuchunchu: ñächapacuycunalla, ürucunapi aläjacunalla, nĩ allin čhanyu müdanacunallawan'a. ⁴Ašhwanpa rasun mana camacä tuqui cawsayca śhun'uyqui luličhu caycuchun, llampu śhun'uwan jawca caycuycäpis. Chay'a sumä-sumä čhanyümi Tayta Diospä. ⁵Chaynümi unaypis Tayta Diosman manchacuywan chalapacü allin walmicunaca wayapanman sujitaculcäśhanpa chipyaycälila. ⁶Chaynümi Sarapis wayapan Abrahamta cäsucul "taytalláy" nila. Amcunapis allinpa cawsaycul imapĩpis mana manchaculcal'a paypa wawinmi capäcunqui.

⁷Chaynütac amcunapis wayapacuna, walmiquiwan tuquip cawsaycäliy pishi śhun'u pishi callpa caycälishanpa jinaman Taytanchicpa llaquipayninpita cawsayta pulayquipis čhasquipäcuśhayquipa. Chaynu-ari cawsaycäliy mañacuyta imapis mana mičhacuśhunayquipä.

Mana allincäwan ama-ari cutichicuyalcaychu

⁸Má, chayurá llapayquipis tuquip cawsapäcuy, juc śhun'ulla, cuyanacul, llaquipänacul, mana nunatucullal ima. ⁹Mana allincäta lulaśhuptiquipis mana allincäwan ama-ari cutichicuyalcaychu, nĩ palaśhuptiquipis palaywan cutichicuyalcaychu, ašhwanpari allincällawan. Chay allincäta čhasquiyčälinayquipämari ayaśha amcunapis capäculanqui. ¹⁰Chaymari niyan:

“¿Sumä cushicuy jawca bida pasaytachun munanqui?

Chayurá mana allin limaycunäpi alluyquitari sujitacuy. Shimi-quipi casquicuna ama-ari imaypis yalaycamuchunchu.

¹¹Mana allincunäpita japächacul allincällactari lulaycuchun. Jawca cawsaycällacta ašhiycul chaymannuy cawsaycuchun.

¹²Taytanchicmari allincäčhu cä nunancunacta ñawillanču caycachin;

linlinpis uyat-uyatyayanmi ayacuynincunacta uyaliycunanpäpis.

Mana allin luläcunäpäñatacmi ichá cuntran cayan”^g nil.

¹³Amcuna allincäta lulayalcaptiqui’a ñamayantan imana-päcushunquimanpis? ¹⁴Masqui allin lulapäcushayquipita ñacachipäcushuptiquipis isumä allinpa licaśham capäcunqui! Chayurá paycuna manchaculcäshanta ama-ari manchaculcaychu, nitac jucmanyapäcuypischu. ¹⁵Aśhwanpa Salbacü Jesusninchicta Duyñuyquitanuy śhun’uyquiĉhu uywaycäliy. Chaynütac shimi puntallayquiĉhu caycuchun alcaycapäcushayquipi tapupäcushuptiqui ima niycunayquipäpis. ¹⁶Ñatac niycälil’a llampu śhun’uyu, chuya śhun’uyu, tuqui allinpa niycäliy. Chaynüpaĉh Jesusĉhu allin capäcushayquipi yan’al tumpäcunaca limaśhanpi uyshulapäcun’a. ¹⁷Allin lulaśhanchicpi ñacanapä Tayta Diospa munaynin cayaptin’a, mas allinmi chay mana allincäpi ñacanapitä. ¹⁸Quiquin Jesusninchicmari juc cutilla pasaypipa^h juchanchiccunapita wañula; Pay mana juchayu cayalpis jucha-sapacunäta Diosman puśhaycuyninwanmi wañula. Nuna cayninĉhu’a wañulam; ispiritu cayninĉhüñatacmi ichá cawsamula. ¹⁹Chay Ispiritup munayninĉhu cayalmi ĉhänälä ispiritucunäman willaycü lila. ²⁰(Má, chay ispiritucuna cala Noé timpuĉhu mana cäsucücunämi. Aw-ari, chay barcueta ishpichiy camacänancama Dios pasinsiawan alcaycuśhancamapis paycuna manamá uyaliculcälachu. Chaymi pusä nunalla yacuwan wañunanpi salbaculcäla. ²¹Chay cala bawtisacunapä tincuycachisha-yupaymi. Chay bawtisacuywan Jesus śhalcamuyninpa wañuycäpi juluycuśha caśhanchictam camalaycachinchic. Manamari yacuwan aychanchic chuyaman muyuśhanpachu, sinu’a chuya śhun’uwan Tayta Diosman limalicuśhanchicpam.) ²²Cananñatacmi janay pachäĉhu Tayta Diospa lädunĉhu Jesus cayan. Paymantacmi lluy anjilcunapis, mandacücunapis, llapa munayniyücunapis sujítaculcan.

Puntanu’a amaña cawsayayñachu

4 ¹Chayurá Salbacü Jesusninchic aychanĉhu ñacaśhannuy amcunapis ñacapäcunayquipä listu caycälinayquim. Chaynu aychanĉhu ñacayäcá juchawan laquinacülunñamari. ²Chaymi cawsaśhancama aychanpa munayninpa maquinĉhüñachu mana cawsan, sinu’a Diospa munaśhanmannüñamá. ³Chay unay lulapäcushayquicunaca chay mana chalapacü wañupaculcäshancunaca caycamallañari cachun: aychayquiwan apachicucunaca, mana allincällacta wañupacucunaca, shincacucunaca, mansibacuy anla fistachacucunaca, chay mana

^h3.18 *pasaypipa*: Waquincunaĉhu’a “pasaypa” nipäcunmi.

^g3.10-12 Sal 34.12-16.

allincunäman alacacuyacunaca, millachicuy taytachacunacta amapacha niycunäpis. ⁴Paycunacta anlacunächu mana lulawshiptiquim licapayllaman camäsha palapäcushunquipis. ⁵Ñatac llapa cawsätapis wañütapis cäraycunanpä listuña cäcämanmi chay lulaynincunapita niycunan can'a. ⁶Chaymari wañushacunämanpis allin willacuy willaycachisha cala Diosninchicnuy ispirituächu cawsaycälinanpä, masqui lluy nunanuy aychanächu wañunanpä cäraycuäsha cayalcalpis.

Dios uycälishuñhayquiächu allin licaycū-cama capäcuy

⁷Canan'a ima-ayca camacänan timpuca cayllaçhüñam cayan. Chaymi sumä tantiaywan-cama sujitacüsha-cama cawsaycälinayqui Tayta Dioswan limaycälinayquipä. ⁸Lluy imapitapis mastä cuyanaculcay. Cuyanacüca maynu juchactapis pampachanmi. ⁹Wasiquicunachüpis jamachipäcuy mana piñacullal. ¹⁰Tayta Dios imaymana allin uycamäshanchiccunacta sumä licaycünin caycälilari umacta uñushayquiman-cama yanapänaculcay. ¹¹Ñatac limaypä cal'a quiquin Dios limañhannu-ari limapaycäliy. Imallacta lulayculpis Dios callpacta uycuñushayquimannu-ari lulaycuy. Llapa lulaycushayquiächu imaycamapis sumä munayniyu sumä cayniyu Jesuspa alawaycuäsha Tayta Dios cananpäri lulaycuy. Chaynu cachun.

Ñacaycunachüpis allincäta lulaycäliy

¹²Cuyañhacuna, nina-yupay sasachacuyacunacta pasayalcäshayquiwan ama-ari licapayllaman camapäcuychu mana yaçhañhayqui-yupaymannu'a. ¹³Añshwanpa Jesusninchicpa ñacawshimasin capäcushayqui cushiculcay sumä caynin camalacamuptin allicta cushiculcänayquipä. ¹⁴Ñatac Tayta Diospa sumä-sumä Ispiriritun imaypis amcunaächu cayaptinmari Jesusninchicpa janan palapäcushuptiquipis cushiculcänayqui. [Masqui paycuna jamuyapäcuptinpis amcunam ichá altuman julaycälinqui.] ¹⁵Ñatac ama ñacayalcaychu caycunacta lulayniquiwan'a: nuna wañuchishayquipita, suwacuñhayquipita, imapis mana allin lulañhayquipita, miticushayquipitapis. ¹⁶Añshwanpa chalapacü cañhayqui-laycu ñacal ama pin'aculcaychu. Sinu'a Tayta Diosta altuman juluycuy Jesusninchicpa pudirnin capäcushayqui. ¹⁷Aw-ari, cäraycunan üraca çhämunñam. Ya'anchic Diospa chulin cäcunapitamari allaycun'a. Caynu ya'anchicwan allaycuyal'a Diospa allin willacuyninta mana cäsucücunapä çimanuylä can'a? ¹⁸Isquirbishançhüpis niyanmi:

“Allin nunäpis sasaypalä salbacuyaptin'a çimanuylä can'a mana allin jucha-sapacá?”ⁱ nil.

ⁱ 4.18 Pr 11.31.

¹⁹Chayurá Diospa munaśhanmannuy ñacácuna, allincäta jina-lla lulaycälil-ari Chalapacuna Cäcäman, Camacücäpa maquinman bïdayquita éhulaycäli.

Michicuna, uwishcunäta sumäta licaycäli

5 ¹Jesusta ñacayninchu ñacawshica, ñatac śhamü sumä caycächu amcunawan caycica, jinaman yaśha caminaycü-masiqüi caycücämi canan anyapaycälic:

²Maquiquiman éhulaycuśhan Tayta Diospa uwishnincunactari paypa munaśhanmannuy täpaycälil sumä buluntäwan michiycäli; ama-ari niycuśhullaptiquichu nïtac illaypa läga-cayllayquiwanchu, sinu'a maynu sumä munacuśhayquiwan-ari. ³Maquiquiman éhulayca-muśhancunäta ama-ari amllaña mandä michiyaychu, sinu'a allin licachipa paycunachu caycäli. ⁴Chaychá quiquin Puydi Michicüca licalimuptin mana camacä sumä-sumä primiueta éhasquipäcunqui.

⁵Chaynütac am müsu lasaccunäpis yaśhacunäman sujitaculcay. Lluywan yanapänaculcänayquipä lluychüpis mana nunatucüśhalla capäcuy. Isquirbishachümi niyan:

“Nunatucücunätä Tayta Diosmi śhaycachin; mana nunatucücunä-tam ichá llaquipayninwan yanapaycun”^j nil.

⁶Chayurá Tayta Diospa sumä munayniyu maquinman uyshuycäli timpullanchu altuman juluycuśhunayquipä. ⁷Ima llaquiculcäśhayquitapis Tayta Diospa maquinman-ari éhulaycäli; paymari ñawillanču cayalcächishunqui.

⁸Ñatac musyat-musyat sumä tantiaywan capäcuy; cuntrapartiqui Satanaśhmari chapatänanpä wañupacuyä liyun-yupay muyupayan mayantapis micunapä. ⁹Chalapacuyniquichu sumä tacyaycäli, jinantin pachächu chalapacü-masiquicunapis chaynüllä ñacaśhanta yačhayalcal'a. ¹⁰Ñatac caynu ash timpulla ñacaycäliptiquim quiquin Tayta Dios muyuchipäcushunqui sumä cabalmanña, masïsumanña, callpayümanña, sumä tacyaycümanñapis. Paymari sumä llaquipaycamäninchic, wiñay simpri sumä-sumä tücäninchicta Jesuspa éhasquinanchipä ayaycamäninchic. ¹¹Pay sumä munayniyücäri imaypis altuman juluycuśha cachun. Chaynu cachun.

Camacalpunanpä limaycun

¹²Chalapacüpa licaśha Silvanowanmi cay ashllay limapaycuyta anyaycälimunacpä isquirbichimulá. Yapam callpanchaycälimuc. Jinaman Diospa llaquipaynin rasun caśhanta niycälic; chayman-ari sumä masïsu chalapaculcay.

^j5.5 Pr 3.34.

¹³Ñatac amcunanüpis Tayta Diospa ayaśhan Babiloniaĉhu cäcämi limaycälimuśhunqui. Chaynütacmi chulí Marcospis limaycälimuśhunqui. ¹⁴Amcunapis sumä cuyacuywan limaycanaculcay.^k

Chalapacü-masïcuna Jesusninchiĉpi jawca cawsay amcunaĉhu caycuchun.

^k **5.14** *sumä cuyacuywan limaycanaculcay*: Griego limayĉhu ‘chuya muchaywan limaycanaculcay’ niyanmi.